



Vischnaunca
Tujetsch

Protocol dalla 11. radunonza da vischnaunca

dils 21 da matg 2025

allas 19.00 uras en Sala Cristalla a Sedrun

**Protocol nr. 11 dalla radunonza da vischnaunca dils 21 da matg 2025
allas 19.00 uras entochen allas 21.13 uras,
ella Sala Cristalla a Sedrun**

Presidi: Martin Cavegn (president communal)
Protocollista: Simona Giossi
Dumbravuschs: Silvio Schmid e Maurin Cavegn
Presents: 27
Perstgisas: Reto Schmid, Daniel Schmid, Ciril Deplazes

Tractandas

1. Beinvegni e constataziuns
2. Approbaziun dil rendaquen 2024 dalla Vischnaunca Tujetsch
3. Approbaziun dil rendaquen 2024 dall'energia alpina
4. Orientaziuns
5. Varia

Tractanda 1 Beinvegni e constataziuns

Il president communal fa in cordial beinvegni a tuttas convischinas e tuts convischins sco era als commembers dalla cumissiun da gestiun tier la endischavla radunonza da vischnaunca dil trienni 2023/2026.

Tractanda 2 Approbaziun dil rendaquen 2024 dalla Vischnaunca Tujetsch

Il quen da gudogn e sperdita pigl onn 2024 siara cun expensas totalas da frs. 19'759'731.76 visavi entradas totalas da frs. 21'899'295.22. Aschia seresulta in gudogn da frs. 2'139'563.46. Vinavon ei vegniu fatg ina remessa supplementara da frs. 200'000.00 per donns da malaura. Quella remessa vegn fatga mintg'onni per haver ina reserva cura ch'ils cuosts da donns da malaura engrevegiassen il quen annual memia fetg. Era ina remessa da frs. 210'000.00 per la Golden Card ei vegnida fatga e plinavon ina remessa da frs. 1.5 milliuns per la sanaziun dil baghetg dalla Scola Sedrun. Il quen d'investiziun dalla facultad administrativa cumpeglia expensas per investiziuns egl import da frs. 8'730'140.22 ed entradas da subvenziuns e contribuziuns da frs. 1'385'390.36, aschia ch'ei seresultan investiziuns nettas da frs. 7'344'749.86. Plinavon explichescha il president communal las entradas ed expensas dallas singulas funcziuns dil quen da gudogn e sperdita e fa attents sin posiziuns, nua ch'ei ha dau ina differenza enviers il preventiv. Plinavon explichescha il president communal ch'il bien resultat ei d'engraziar alla buna situaziun hidrologica digl onn 2024. Sch'ei plova a Tujetsch – lu plova ei daners.

Silsuenter vegn il rapport dalla cumissiun da gestiun prelegius. Tenor il giudicament dalla cumissiun da gestiun corrispunda il quen communal che siara per ils 31 da december 2024 allas prescripziuns dallas leschas vertentas. La cumissiun da gestiun propona alla radunonza da vischnaunca d'approbar il quen annual 2024 e da dar scarica alla suprastonza communal, als ulteriurs organs comunals responsabels sco era alla administraziun communal. Il president dalla cumissiun da gestiun supplichescha plinavon la suprastonza communal dad intervegnir tier ils patruns da construcziun en caussa resort a Dieni.

Debatta d'entrada

Negina debatta d'entrada ei giavischada.

Votaziun

La radunonza da vischnaunca ha approbau unanimamein il quen digl onn 2024 dalla Vischnaunca Tujetsch.

La radunonza da vischnaunca ha dau unanimamein scarica a tuts organs comunals.

La radunonza da vischnaunca ha priu unanimamein per enconuschientscha ils quens annuals 2024 dalla Residenza Dulezi SA e dalla Sedrun Disentis Tourismus SA.

Tractanda 3 Approbaziun dil rendaquen 2024 dall'energia alpina

Il president dil cussegl d'administraziun dall'energia alpina orientescha davart las impurtontas midadas digl onn 2024. Il quen da gudogn e sperdita dall'energia alpina siara cun expensas totalas da menaschi da frs. 12'389'286.00 visavi entradas totalas da menaschi da frs. 15'483'992.00 e cun entradas nettas da finanzas en altezia da frs. 9'055.00. Suenter las deducziuns e remessas da frs. 2'026'077.00 resulta in gudogn digl onn da frs. 1'077'685.00. L'energia alpina ha giu igl onn 2024 il meglier gudogn en sia historia.

Debatta d'entrada:

In convischin depona il giavisch che la suprastonza communal prendi ina decisiun en favur dalla populaziun da Tujetsch e pondereschi da sbassar il prezi d'energia - specialmein sch'ins vesi ch'il gudogn dalla energia alpina seigi aschi buns.

Il president communal pren encunter quei giavisch e vegn a tractar quel en suprastonza communal.

Votaziun

La radunonza da vischnaunca ha approbau unanimamein il quen ed il rapport annual 2024 dall'energia alpina cun prender enconuschientscha il rapport digl organ da revisiun.

La radunonza da vischnaunca ha approbau unanimamein l'utilisaziun dil gudogn dall'energia alpina ella summa da frs. 1'407'685.00 che preveda:

- **Ina conderschida alla Vischnaunca Tujetsch da frs. 300'000.00**
- **In'attribuziun allas reservas legalas da frs. 30'000.00**
- **In transport sil niev quen dall'energia alpina da frs. 1'077'685.00 (nova reserva suenter sura attribuziun frs. 3'097'741.00)**

La radunonza da vischnaunca ha dau unanimamein scarica al cussegl d'administraziun dall'energia alpina.

Tractanda 4 Orientaziuns

Il president communal presenta la Golden Card e declara daco che quella seigi vegnida lantschada. L'iniziativa da porscher enzatgei als indigens seigi vegnida dallas vischnauncas Tujetsch e Disentis/Mustér. Plinavon duei la Golden Card promover il svilup dil liug ellas vischnauncas da Tujetsch, Disentis/Mustér, Andermatt, Realp e Hospental. Per ch'il project da pilot da treis onn rendi, seigi ei impurtont ch'aschi biaras persunas sco pusseivel cumprien la Golden Card.

Gerau Guido Monn declara davart la nova Senda sur Vitg sur la punt dalla Val Strem. Las lavurs seigien s'avanzadas e la senda sappi beingleiti vegnir nezegiada. Plinavon orientescha il gerau ch'ils impressaris entscheivien quest'jamna cun las lavurs vid la casa da giuvenils. La via da Gionda si resti per quei motiv serrada per rodund duas entochen treis jamnas.

Tractanda 5 Varia

In convischin tschenta la damonda co ei mondi vinavon cul resort a Dieni. El fa quitaus ch'ins hagi gia daditg udiu nuot en caussa e supplichescha che la suprastonza communal prendi si contact cun Samih Sawiris e siu feigl sco era cun ils patrums da construcziun, per ch'il pievel Tuatschin vegni ina gada informaus adequatamein. Il resort seigi fetg empermettents per nosa val ed ei seigi neras uras da saver sch'il qual vegni realisaus ni buc.

Il president communal sincerescha ch'el fetschi squetsch nua ch'ei seigi mo pusseivel e quei gia dapi in temps. El hagi survegniu ina confirmaziun a bucca ch'il resort vegni baghegius igl onn 2027. El capescha ils dubis dil pievel e pren serius la damonda. Il president ha enzcu il fenadur ni uost ina sesida cun Samih Sawiris e spera ch'el sappi beingleiti informar pli concretamein en caussa.

Maurin Cavegn supplichescha la suprastonza communal d'elavurar in regulativ pertuccont la cumpra da terren agricol ordvart la zona da baghegiar entuorn las tegias da mises. In gruppa d'interess ha luvrau ora in pèr puncts sco proposta. Il giavisch dil convischin ei che la suprastonza elavureschi il regulativ enteifer ils proxims sis meins. Cul regulativ duei vegnir fatg uorden entuorn ils mises sco era ils camps e plinavon caschunassi quei in'entrada per la vischnaunca.

Il president communal pren posiziun e declara ch'in tal regulativ seigi gia stau tema avon rodund quater onns. Bugen pren la suprastonza communal encunter il giavisch e sincerescha d'elavurar in regulativ pertuccont la cumpra da terren agricol.

In convischin vul saver co ei vesi ora cun la parcella digl anteriur Hotel Oberalp.

Gerau Pius Cavegn declara ch'il cass seigi pulit difficils. Il gerau ha giu contact cul niev derschader dalla dertgira administrativa e cul niev possessur dalla parcella. Lunsch seigi el aunc buca vegnius, denton seigi il niev possessur obligaus da baghegiar anavos las lavurs sil stan oriund. Il crest da tratsch stoppi vegnir allontanaus il pli tard igl atun da quest onn.

Il medem convischin damonda sch'ins savessi sliagar si la deponia da material a Claus.

Il president communal declara che quei schaigi per il mument buc ella cumpetenzza dalla vischnaunca mobein dils impressaris che nezegien la deponia. In contract d'explotar vala entochen ils 31.12.2040.

Il president communal engrazia per la presenza, la participaziun e la confidonza. El siara la radunonza da vischnaunca allas 21.13 uras e giavischa in bien retuorn a casa.

Protocollista:
Simona Giossi

President communal:
Martin Cavegn